



Ollscoil Mhá Nuad Maynooth University

Scoil an Léinn Cheiltigh Teagascóir Gaeilge (Conradh Sealadach 9 mí)

An Ról

Tá Ollscoil Mhá Nuad tiomanta do straitéis ina bhfuil spriocanna bunaidh sin na hOllscoile, barr feabhais sa taighde agus sa scoláireacht agus oideachas den chéad scoth, fite fuaite ina chéile agus an meas céanna orthu.

Tá Teagascóir Gaeilge á lorg ag an Ollscoil le tacú le teagasc agus measúnú na Gaeilge i Scoil an Léinn Cheiltigh. Beidh an té a cheapfar freagrach do Stiúrthóir Lárionad na Gaeilge: Taighde, Teagasc agus Tástáil.

Príomhdhualgais

Beidh ar an Teagascóir Gaeilge tabhairt faoi pé dualgais a shonróidh an Ollscoil taobh istigh d'uaireanta oibre an chonartha, i sásamh Stiúrthóir Lárionad na Gaeilge. Féadfaidh na dualgais seo a leanas a bheith i measc na ndualgas sin, ach níl siad teoranta dóibh:

- Cuidiú le curaclam na Gaeilge a theagasc trí na meáin seo a leanas: ranganna teagaisc, léachtaí, ceardlanna teanga, clinicí teanga (ina múinfear scileanna éagsúla teanga agus cumarsáide, lena n-áirítear an Ghaeilge labhartha agus scríofa, chomh maith le scileanna cluastuisceana agus léamhthuisceana).
- Ábhar teagaisc a dhearadh, a bhailiú agus a uasdátú, lena úsáid i ranganna teanga ar an gcampas agus i gcúrsaí cianfhoghlama agus i gcúrsaí foghlama cumaisc.
- Dul i gcomhairle le Stiúrthóir Lárionad na Gaeilge agus le baill eile na Scoile le forbairt agus uasdátú a dhéanamh ar an gcuraclam teanga.
- An t-ullmhúchán riachtanach go léir a dhéanamh chun go mbeifear in ann ábhar na gcúrsaí a mhúineadh, an fhoghlaim idirghníomhach a threorú, eolas a thabhairt agus ceistanna na mac léinn a fhreagairt.
- Anailís a dhéanamh ar riachtanais na mac léinn, monatóireacht a dhéanamh ar an dul chun cinn a dhéanann siad, aiseolas éifeachtach a thabhairt dóibh go rialta, agus aon ábhar imní i dtaca le feidhmíocht na mac léinn a chur ar a s(h)úile d'Eagraí an Chúrsa.
- Páirt a ghlacadh, faoi mhaoirseacht, in obair chúrsa, scrúduithe scríofa nó cineálacha eile measúnaithe a cheartú agus a mharcáil.
- Cuidiú le scrúduithe cainte.

- Cinntiú go ndéantar go tráthúil an riarachán cuí a bhaineann le cúrsaí/cláir agus láimhseáil sonraí.
- Freastal ar chruinnithe agus páirt a ghlacadh le baill eile foirne i bhforbairt straitéisí teagaisc agus foghlama, lena n-áirítear modúil teanga a dhearadh agus a fhorbairt.
- Cuidiú le comhordú nó monatóireacht a dhéanamh ar na cúrsaí teanga a dhéanann na mic léinn sa Ghaeltacht.
- Coinneáil bord ar bord le forbairtí sa teangeolaíocht fheidhmeach, agus an dea-chleachtas agus an nuálaíocht sa teagasc agus sa mheasúnú teanga a chur chun cinn i gcónaí.
- Tacú le tionscadail taighde Lárionad na Gaeilge agus na Scoile, nuair is cuí.
- Dualgais eile a bhaineann le teagasc agus measúnú na Gaeilge a chomhlíonadh, de réir mar a shonraíonn Stiúrthóir Lárionad na Gaeilge.

Beidh ag an iarrthóir is oiriúnaí:

Critéir riachtanacha:

- Céim onóracha agus iarchéim sa Ghaeilge nó in ábhar eile cuí;
- Ardleibhéal inniúlachta agus cruinnis sa Ghaeilge, idir scríofa agus labhartha (C1 TEG nó a chomhionann);
- Taithí ar theagasc na Gaeilge in earnáil an ardoideachais nó an aosoideachais;
- Sárscoilleana riaracháin, eagrúcháin, obair bhuíne agus cumarsáide;
- Scileanna maithe ríomhaireachta.

Critéir inmhianaithe:

- Cur amach maith ar churaclam na Gaeilge in institiúidí tríú leibhéal;
- Taithí ar a bheith ag dearadh ábhar teagaisc agus acmhainní foghlama, agus tuiscint ar an dea-chleachtas a bhaineann leis na réimsí sin;
- Tuiscint mhaith ar an teangeolaíocht fheidhmeach agus/nó ar an measúnú teanga;
- Cáilíocht iarchéime sa teangeolaíocht fheidhmeach nó spéis tabhairt faoi staidéar iarchéime sa réimse sin.

Dámh agus Institiúidí Taighde

Tá Dámh na nDán agus na nDaonnachtaí comhdhéanta de Ranna na Sean-Chlasaicí, na Staire, an Cheoil, na Fealsúnachta, Scoil an Léinn Cheiltigh, Scoil na Nuatheangacha, na Litríochtaí agus na gCultúr, Roinn an Bhéarla, Roinn Staidéar ar na Meáin agus an institiúid taighde, an Institiúid Ealaíon agus Daonnachtaí. Is é ról na Dáimhe comhordú a dhéanamh ar ghníomhaíochtaí acadúla na rann éagsúil, maoirseacht a dhéanamh ar fhorbairt straitéiseach na rann agus tacú le gníomhaíochtaí agus le cláir idir-rannacha. Tá roinnt institiúidí idirdhisciplíneacha ceaptha ag an Ollscoil freisin chun tacú le taighde den scoth agus chun cumas taighde a fhorbairt sna disciplíní ar fad.

Lárionad na Gaeilge: Taighde, Teagasc agus Tástáil

Is aonad de chuid Scoil an Léinn Cheiltigh é Lárionad na Gaeilge, a tháinig in áit Ionad na dTeangacha agus atá ag tógáil ar an obair cheannródaíoch a rinneadh san Ionad ar feadh breis is fiche bliain. Is é misean Lárionad na Gaeilge teagasc agus oiliúint teanga ar ardchaighdeán a chur ar fáil, a fhreagraíonn d'athruithe i gcomhthéacs an oideachais san Ollscoil féin, sa phobal a bhfreastalaíonn an Ollscoil air agus ar bhonn idirnáisiúnta.

Tá teist na nuálaíochta ar obair an Lárionaid ó bunaíodh é agus féachann muid i dtreo an dea-chleachtais idirnáisiúnta lena chinntiú go mbíonn an taighde, teagasc agus tástáil, atá mar chrann taca na hoibre, ar an gcaighdeán is airde.

I dteannta leis an teagasc teanga a dhéantar do Roinn na Nua-Ghaeilge, do ranna eile ollscoile, don fhoireann agus don phobal i gcoitinne, tairgeann an Lárionad an Dioplóma Iarchéime agus an MA san Aistriúchán agus san Eagarthóireacht (ar líne), an Teastas i Múineadh na Gaeilge (ar líne), an Dianchúrsa i Scríobh na Gaeilge (ar líne) agus Teastas Eorpach na Gaeilge (TEG). Is gné thábhachtach d'obair an Lárionaid na gníomhaíochtaí for-rochtana idir na cúrsaí ar líne thuasluaite agus ionaid scrúduithe TEG ar fud na hÉireann agus thar lear.

Is é Lárionad na Gaeilge ball na hÉireann san *Association of Language Testers in Europe* (ALTE) agus bronnadh Q-Mharc ALTE ar an Lárionad faoi dhó do scrúduithe TEG. Tá an Séala Eorpach Teanga bainte trí huair ag an Lárionad. Chomh maith leis na cúrsaí agus na scrúduithe, cuirtear acmhainní d'fhoghlaimoirí Gaeilge ar fáil ar an suíomh www.snas.ie.

Bunaítear obair an Lárionaid ar an taighde agus an dea-chleachtas i réimse an mheasúnaithe teanga agus na teangeolaíochta feidhmí agus is gnách go dtógann muid tograí taighde ar láimh agus go gcuireann muid comhdhálacha ar siúl sna réimsí seo. Déanann muid measúnú teanga chomh maith do ranna acadúla eile in Ollscoil Mhá Nuad agus in ollscoileanna eile mar chuid de thograí taighde.

Roinn na Nua-Ghaeilge

Is cuid de Scoil an Léinn Cheiltigh Roinn na Nua-Ghaeilge. Tá seachtar léachtóirí sa Roinn agus beirt teagascóirí lánaimseartha a oibríonn i bpáirt le Lárionad na Gaeilge, mar aon le roinnt léachtóirí agus teagascóirí páirtaimseartha agus tairgeann sí céimeanna fochéime agus iarchéime i dtimpeallacht fhuinniúil foghlama, bunaithe ar a neart taighde sa teanga agus sa litríocht.

An Ollscoil

Is ollscoil faoi leith í Ollscoil Mhá Nuad, institiúid choláisteach atá dírithe ar na daonnachtaí agus ar na heolaíochtaí sóisialta, ar an eolaíocht agus ar an innealtóireacht, chomh maith leis an taighde, an teagasc agus an rannpháirtíocht sa phobal. Tá an Ollscoil suite i Maigh Nuad, an t-aon bhaile ollscoile in Éirinn, agus cuireann stair agus oidhreacht uathúil an bhaile go mór le carachtar agus le féiniúlacht na hinstitiúide. Cuirtear oideachas ar ardchaighdeán ar fáil do bhreis is 15,000 mac léinn ar an gcampas, áit a bhfuil stair an 18ú haois agus nuálaíocht an 21ú haois araon ag baint léi.

Ó bunaíodh Ollscoil Mhá Nuad mar ollscoil phoiblí neamhspleách 25 bliain ó shin, tá forbairt shuntasach straitéiseach agus éachtaí as cuimse déanta aici, rud atá ina údar iontach mórtais ag baill foirne, ag mic léinn, ag céimithe agus ag pobal na hOllscoile araon. In 2024, aithníodh Ollscoil Mhá Nuad i measc an 90 ollscoil óg is fearr ar domhan, nuair a tháinig sí sa 86ú háit de réir Times Higher Education (THE). Tá an dea-cháil atá ar Ollscoil Mhá Nuad ar fud an domhain bunaithe ar roinnt gnéithe; ina measc, nuálaíocht, ardchaighdeán, tábhacht agus tionchar a cuid taighde agus scoláireachta; an tiomantas don oideachas agus don fhoghlaim; caighdeán na gclár acadúil; agus an cheannaireacht atá léirithe aici chun an rannpháirtíocht san ardoideachas a leathnú. Is iad tiomantas na mball foirne agus fuinneamh agus rannpháirtíocht na mac léinn is cúis leis an rath seo atá ar an Ollscoil.

Is áit í Ollscoil Mhá Nuad a bhfuil roinnt codarsnachtaí ag baint léi; institiúid nua-aimseartha í atá ag fás go tapa, agus í dírithe ar an taighde agus í rannpháirteach i sochaí an lae inniu, ach tá sí fréamhaithe freisin sna buanna acadúla agus sna traidisiúin léinn a bhaineann léi go stairiúil. Cuireann an Ollscoil réimse leathan clár fochéime, iarchéime agus dochtúireachta ar fáil do bhreis is 15,000 mac léinn sna daonnachtaí, san eolaíocht agus innealtóireacht, sna heolaíochtaí sóisialta, lena n-áirítear an gnó, an dlí agus an t-oideachas, chomh maith le cláir agus comhpháirtíochtaí idirnáisiúnta.

Cothaíonn an cultúr uathúil comhghleacúil atá le fáil in Ollscoil Mhá Nuad cur chuige idirdhisciplíneach i leith an taighde, cur chuige a chuireann ar chumas na foirne acadúla dul i ngleic le cuid de na dúshláin

is mó atá le sárú ag sochaí an lae inniu. Daingníonn institiúidí agus ionaid taighde na hOllscoile tionchar na hoibre sin, trí phobail bhríomhara foghlama, fionnachtana agus chruthaitheachta a chothú. Bíonn an taighde ag croílár an teagaisc san Ollscoil freisin, agus is ábhar bróid don Ollscoil é go bhfuil an taighde agus an teagasc ar comhchéim san institiúid.

Prionsabail agus luachanna

Léiríonn ár luachanna cé muid féin, cén rud a gcreideann muid ann agus conas a iompraíonn muid féin mar phobal. Is orthu sin a bhraitheann an rath a bheidh orainn amach anseo, na hionchais atá againn dúinn féin agus dá chéile. Baineann ár luachanna le gach duine i bpobal na hOllscoile:

- Ionracas
- Comhghleacaíocht
- Freagracht
- Saoirse cainte
- Uaillmhian

Plean Straitéiseach Ollscoil Mhá Nuad 2023 - 2028

Tógann Plean Straitéiseach na hOllscoile 2023 - 2028 ar ár stair acadúil shaibhir agus ar ár mbunchlocha láidre chun conair uaillmhianach agus cheannródaíoch a leagadh amach do thodhchaí ár nOllscoile. Soiléiríonn an treochlár seo ár dtiomantas do dhul i dtaithí ar dhomhan atá ag síorathrú agus ár ngníomhaíochtaí a chur in oiriúint dó, agus san am céanna a bheith dílis dár luachanna Ollscoile. Is í an fhís atá againn a bheith mar ollscoil feabhais, deiseanna agus tionchair, agus lámh láidir a bheith againn i ngach ceann de na trí ghné seo.

Léigh anseo le haghaidh breis eolais faoi thodhchaí Ollscoil Mhá Nuad:
<https://strategy.maynoothuniversity.ie/?lang=ga>

Roghnú agus Ceapadh

- Ní thabharfar cuireadh chun agallaimh ach d'iarrthóirí a n-éireoidh leo an gearrliosta a bhaint amach;
- D'fhéadfaí iarraidh ar na hiarrthóirí a dtabharfar cuireadh chun agallaimh dóibh scrúdú teanga agus/nó cur i láthair gairid a dhéanamh;
- Ceadóidh an tUachtarán ceapacháin bunaithe ar thuairisc an bhoird roghnúcháin;
- Tá sé i gceist na hagallaimh a reáchtáil ag tús mhí Dheireadh Fómhair 2025, más féidir;
- Táthar ag súil go mbeidh feidhm leis an gceapachán ó thús mhí na Samhna 2025, nó a luaithe agus is féidir ina dhiaidh sin.

Comhionannas agus Éagsúlacht

Tá Ollscoil Mhá Nuad tiomanta do bheith ina hinstitiúid a chothaíonn comhionannas, a thugann meas agus luach don éagsúlacht, agus a chuireann an ionchuimsitheacht chun cinn. Chun tuilleadh eolais a fháil ar ár dtiomantas don Chomhionannas agus Éagsúlacht, féach ar na polasaithe seo a leanas: [Polasaí Comhionannais agus Éagsúlachta](#) Ollscoil Mhá Nuad agus ár bpolasaí maidir le [Employment of People with Disabilities](#) agus ár [Gender Equality Action Plan 2023-2026](#).

Téarmaí agus coinníollacha

Téarma an chonartha	Is post lánaimseartha sealadach é seo, go dtí 31-07-2026.
Tuarastal	Teagascóir Ollscoile (2025): €45,051- €57,348 p.a (7 bpointe) De réir fhorálacha pá na hearnála poiblí a dhéanfar ceapacháin.
Uaireanta oibre	Tá seachtain oibre 37 uair an chloig i bhfeidhm maidir le poist lánaimseartha. D'fhéadfaí athbhreithniú nó coigeartú a dhéanamh ar na huaireanta hoibre seo ó am go ham, bunaithe ar chomhaontuithe náisiúnta.
Áit	Is é campas Ollscoil Mhá Nuad, Maigh Nuad, Co. Chill Dara an áit oibre.
Saoire bhliantúil	Tugtar saoire bhliantúil agus laethanta saoire poiblí de réir pholasaí na hOllscoile: https://www.maynoothuniversity.ie/human-resources/policies/annual-leavepolicy Tugtar saoire bhliantúil ar bhonn pro rata i gcás poist pháirtaimseartha agus shealadacha.
Polasaithe agus scéimeanna Ollscoile	Beidh fostaithe de chuid na hOllscoile faoi réir pholasaithe agus scéimeanna na hOllscoile, atá ar fáil ar shuíomh gréasáin na hOllscoile ag: https://www.maynoothuniversity.ie/university-policies https://www.maynoothuniversity.ie/human-resources/policies
Pinsean	Is post inphinsin é seo. Glacfaidh fostaithe de chuid na hOllscoile páirt i scéim pinsin don earnáil phoiblí. Tá sonraí maidir leis na scéimeanna sin ar fáil ag: https://www.maynoothuniversity.ie/human-resources/pension-information

Incháilitheacht	Fáiltítear roimh iarratais ó shaoránaigh neamh-LEE. Ba chóir d'iarratasóirí a thabhairt faoi deara gurb í an Roinn Fiontar, Trádála agus Fostaíochta a rialaíonn incháilitheacht. Tá tuilleadh eolais maidir le hincháilitheacht ar fáil ag: https://enterprise.gov.ie/en/what-we-do/workplace-and-skills/employmentpermits/employment-permit-eligibility/ Tá iarratasóirí neamh-LEE freagrach as a chinntiú gur féidir leo víosa a fháil chun taisteal go hÉirinn. Tá aon tairiscint fostaíochta ag brath ar iarratasóirí na ceadanna fostaíochta cuí a fháil. Iarfhostaithe de chuid Sheirbhís Phoiblí na hÉireann - Srianata Áirithe ar Cháilitheacht D'fhéadfadh go gcuirfí isteach ar incháilitheacht iarratasóirí a bhí fostaithe roimhe seo ag eagraíocht de chuid Earnáil Phoiblí na hÉireann, agus a bhain leas as Scéim Iomarcaíochta de chuid Sheirbhís Phoiblí na hÉireann nó Scéim Dreasachta Scoir faoi na Scéimeanna thíos: • Comhaontú Comhchoiteann: Íocaíochtaí Iomarcaíochta le Seirbhísigh Phoiblí • Scéim Dreasachta um Luathscor (ISER) • Ciorclán na Roinne Sláinte agus Leanaí (7/2010) • An Roinn Comhshaoil, Pobail & Rialtais Áitiúil (Ciorclán LG(P) 06/2013) Ba cheart d'iarratasóirí a chinntiú go bhfuil siad i dteideal a bheith fostaithe arís i Seirbhís Phoiblí na hÉireann faoi théarmaí Scéimeanna dá leithéid. Ba cheart d'iarratasóirí ceisteanna faoi seo a chur faoi bhráid a gcuid iarfhóistoirí in Earnáil Phoiblí na hÉireann.
Grinnfhiosrúchán Garda	D'fhéadfadh go mbeadh grinnfhiosrúchán nó imréiteach Garda ag teastáil ón Ollscoil.
Scrúdú leighis	D'fhéadfadh go mbeadh scrúdú leighis ag teastáil ón Ollscoil mar choinníoll fostaíochta.

Dlí Cosanta Sonraí

Déanfaidh Ollscoil Mhá Nuad próiseáil ar shonraí pearsanta a thugann tú mar chuid de d'iarratas ar an ról seo de réir Pholasaithe Cosanta Sonraí na hOllscoile.

Le tuilleadh eolais a fháil faoi Pholasaithe Cosanta Sonraí agus Fógra Príobháideachais na hOllscoile, féach ar ár suíomh gréasáin: <https://www.maynoothuniversity.ie/data-protection>

Treoracha iarratais

Dáta deiridh:

23:30 (am na hÉireann) **Dé Domhnaigh, 21 Meán Fómhair 2025.**

Ní mór iarratais a dhéanamh ar an bpost trínár **dTairseach Earcaíochta ar Líne** ag an nasc seo a leanas: <https://www.maynoothuniversity.ie/human-resources/vacancies>

Caithfear iarratais a chur isteach faoin dáta deiridh agus faoin am a shonraítear thuas. Cealóidh an córas go huathoibríoch iarratais atá fós idir lámha ag an am deiridh ar an dáta deiridh sonraithe.

Ní ghlacfar le hiarratais mhalla.

Is fostóir comhdheiseanna í Ollscoil Mhá Nuad

Tá an post seo faoi réir Reachtanna na hOllscoile

